



nogorikito

wadah informasi anda

Bersih • Muafakat • Sejahtera

Edisi Februari 2023

TUNS, TUNS PLUS & TUNS EXTRA BANTU USAHAWAN MAJUKAN PERNIAGAAN

Sebanyak RM 28 Juta telah diperuntukkan oleh Kerajaan Negeri Sembilan bagi membantu golongan peniaga kecil memajukan perniagaan mereka.

› Baca lanjut di halaman 3

PKNNS didik peniaga kecil perkasa perniagaan

Inisiatif Tabung Usahawan Negeri Sembilan (TUNS) dan TUNS PLUS mendidik peniaga kecil dan usahawan kecil memperkasakan perniagaan mereka.

Ketua Eksekutif Perbadanan Kemajuan Negeri, Negeri Sembilan (PKNNS), Puan Rusmimah Mat Derus berkata, TUNS dan TUNS PLUS mewajibkan pemohon mendaftar perniagaan mereka dengan Suruhanjaya Syarikat Malaysia (SSM).

"Kebanyakkan peniaga kecil yang bermiaga di tepi jalan tiada SSM. Ada pula usahawan kecil yang menjalankan perniagaan dari rumah.

"Apabila peniaga kecil dan usahawan kecil berdaftar dengan SSM, dia menjadi peniaga yang formal, berstruktur dan berdaftar.

"Selain itu pemohon TUNS dan TUNS PLUS yang berjaya perlu membuka akaun bank (current account) bagi urusan bayaran inisiatif," kata Rusmimah.



Didik usahawan kecil menstruktur semula perniagaan

Rusmimah berkata, ini secara langsung mendidik peniaga kecil dan usahawan kecil menstruktur semula perniagaan mereka.

"Bila sudah ada SSM, peniaga kecil dan usahawan kecil boleh memasarkan produk

mereka secara lebih meluas.

"Contohnya PKNNS membuka peluang kepada peniaga kecil dan usahawan kecil bermiaga di NS Fest, tetapi mereka perlu mempunyai SSM.

"Tujuan kita meminta pemohon yang berjaya membuka 'current account' pula bagi

mendidik mereka menguruskan akaun perniagaan secara sistematis dan profesional.

"Kalau tidak aliran tunai (cash flow) untuk tujuan perniagaan dan perbelanjaan peribadi akan campur aduk dan ini bukan sistem pengurusan kewangan yang efisyen," jelas Rusmimah.

TUNS dan TUNS PLUS berjaya tingkatkan pendapatan

Inisiatif Tabung Usahawan Negeri Sembilan (TUNS) dan TUNS PLUS yang diperkenalkan Kerajaan Negeri Sembilan berjaya meningkatkan pendapatan peniaga kecil.

Ketua Eksekutif PKNNS, Puan Rusmimah Mat Derus berkata, sejak inisiatif ini diperkenalkan pada tahun 2019, seramai 82.9 peratus peniaga kecil berjaya tingkatkan pendapatan.

"Kajian yang dijalankan mendapati 82.8 peratus peniaga kecil berjaya men-

awarkan peluang pekerjaan.

"Ini menunjukkan inisiatif TUNS bukan sahaja menawarkan bantuan kewangan dan peralatan kepada peniaga kecil, malah merangsang ekonomi setempat dengan menawarkan peluang pekerjaan," ujar beliau.

Rusmimah berkata demikian dalam temubual khas bersama Nogori Kito dengan mengupas inisiatif TUNS, TUNS PLUS dan TUNS EXTRA yang ditawarkan oleh Kerajaan Negeri Sembilan.



TUNS, TUNS PLUS dan TUNS EXTRA bantu usahawan majukan perniagaan

Tabung Usahawan Negeri Sembilan (TUNS), TUNS PLUS dan TUNS EXTRA diperkenalkan oleh Kerajaan Negeri Sembilan bagi membantu usahawan kecil memajukan perniagaan mereka.

Exco Pelaburan, Perindustrian dan Keusahawanan, YB Dato' Dr.Mohamad Rafie Abd Malek berkata, inisiatif TUNS yang diperkenalkan oleh Kerajaan Negeri sejak tahun 2019 ini sangat membantu peniaga kecil mengembangkan perniagaan mereka.

"Mungkin bantuan RM3,000 (TUNS) tidak besar tapi ianya sangat membantu peniaga kecil seperti peniaga menjual murtabak, mee goreng dan nasi lemak membesarakan perniagaan mereka."

"Inisiatif yang diperkenalkan Kerajaan Negeri ini mendapat sambutan cukup baik daripada peniaga kecil (TUNS) dan usahawan kecil (TUNS PLUS)," kata beliau.

Usahawan mestilah maju dari semasa ke semasa

Dalam pada itu, Mohamad Rafie berkata, TUNS PLUS diperkenalkan pada tahun 2021 bagi membantu usahawan kecil memajukan perniagaan mereka.

"Contohnya seorang usahawan mempunyai sebuah ke-

dai runcit sejak 10 tahun lalu dan 10 tahun akan datang masih memiliki sebuah kedai runcit.

"Sepatutnya kalau 10 tahun dulu ada satu kedai runcit, sekarang dah ada beberapa kedai runcit dan 10 tahun akan datang mungkin memiliki rangkaian pasaraya."

"Inilah tujuan Kerajaan Negeri memperkenalkan TUNS PLUS iaitu pinjaman tanpa faedah maksimum RM15,000 dan TUNS EXTRA dengan geran padanan (matching grant) RM30,000," jelas Mohamad Rafie.

TUNS EXTRA RM30,000

Sementara itu kata Mohamad Rafie, TUNS EXTRA yang diperkenalkan pada tahun ini (Belanjawan 2023) merupakan geran padanan dengan bantuan maksimum RM30,000.

"Sekiranya seorang pemohon yang berjaya ingin membeli sebuah mesin berharga RM60,000 untuk tujuan perniagaan, maka beliau hanya perlu mengeluarkan kos sendiri sebanyak RM30,000.

"Kerajaan Negeri melalui Perbadanan Kemajuan Negeri, Negeri Sembilan (PKNNS) pula akan memberi RM30,000. Ini yang dipanggil geran padanan."



"Namun, sekiranya usahawan tersebut membeli peralatan berharga RM100,000; geran maksimum yang diberi tetap RM30,000," kata Mohamad Rafie.

Kerajaan Negeri mahu peniaga kecil berdikari

Menurut Mohamad Rafie, dana TUNS, TUNS PLUS dan TUNS EXTRA yang diperuntukkan 100 peratus disalurkan kepada rakyat.

"Hal ini kerana tiada sebarang kos pengurusan dikenakan disebabkan kita mempunyai kakitangan PKNNS yang akan menguruskan proses permohonan TUNS, TUNS PLUS dan TUNS EXTRA."

"Kerajaan Negeri memperkenalkan TUNS, TUNS PLUS dan TUNS EXTRA bagi mendidik, membantu dan mengembangkan perniagaan usahawan kecil."

"Pada masa yang sama usahawan juga perlu membantu diri mereka sendiri."

"Hasrat Kerajaan Negeri mahu membantu peniaga dan usahawan kecil keluar dari masalah dan mampu berdikari," ujar beliau lagi.

Rafie berkata demikian dalam temuramah khas bersama Nogori Kito yang membincangkan inisiatif TUNS, TUNS PLUS dan TUNS EXTRA yang diperkenalkan oleh Kerajaan Negeri Sembilan.

Hubungi Pejabat ADUN untuk bantuan permohonan TUNS dan TUNS PLUS

Exco Pelaburan, Perindustrian dan Keusahawanan, YB Dato' Dr.Mohamad Rafie Abd Malek berkata, proses penilaian dan kelulusan permohonan TUNS dan TUNS PLUS dilaksana dengan ketelusan 100 peratus.

"Kebanyakkan permohonan Tabung Usahawan Negeri Sembilan (TUNS) dan TUNS

PLUS yang gagal adalah disebabkan tidak mematuhi syarat yang ditetapkan atau gagal mengemukakan dokumen berkaitan yang dikehendaki."

"Sebab itu kita galakkan pemohon hubungi Pejabat Ahli Dewan Undangan Negeri (ADUN) dan Pejabat Penye-

laras DUN untuk bantuan permohonan."

"Pejabat ADUN dan Penyealaras DUN mempunyai kemudahan internet, komputer dan kakitangan untuk membantu mengisi borang permohonan serta memuatnaik salinan dokumen secara online," jelas Mohamad Rafie.

Usahawan tani berjaya tingkatkan produktiviti menerusi **TUNS PLUS**

TUNS PLUS bukan sahaja membantu usahawan kecil yang menjalankan perniagaan makanan, kesihatan, jahitan atau produk jualan; malah menawarkan bantuan kewangan kepada pengusaha pertanian.

Handalah Idrus dari Sendayan berjaya meningkatkan produktiviti selepas menerima pinjaman tanpa faedah TUNS PLUS sebanyak RM15,000.

"Saya dari awal mengusahakan pertanian Hidropotik Nutrient Film Technique (NFT) mempunyai perancangan mengembangkan perniagaan ini tetapi saya menghadapi kekangan modal.

"Justeru, apabila mendapat sahaja dana TUNS PLUS sebanyak RM15,000, saya terus meluaskan tanaman Hidropotik saya.

"Sebelum ini saya mengusahakan dengan 24 meja Hidropotik NFT.

"Hasil bantuan TUNS PLUS, saya berjaya meluaskan tanaman kepada 168 meja (5 x 40 kaki per meja) Hidropotik NFT.

"Ini secara langsung meningkatkan produktiviti dan pendapatan syarikat saya," kata Handalah.

Handalah berkata, sebelum ini beliau mengharapkan pusingan modal daripada hasil jualan sekiranya mahu mengambil pekerja.

"Namun, dengan dana ini saya lebih yakin untuk menambah pekerja.

"Apabila sudah menambah pekerja, produktiviti dan hasil pendapatan juga telah ber-



ganda.

bangkan perniagaan mereka.

"Saya berharap pada masa akan datang akan ada lebih banyak dana bantuan untuk usahawan kecil mengem-

"Bantuan seperti TUNS PLUS ini amat diperlukan oleh usahawan kecil," ujar beliau.

Tempahan Nasi Arab bertambah, pelanggan lebih ramai



Hasil perniagaan seorang pengusaha restoran Nasi Arab semakin bertambah selepas beliau memanfaatkan bantuan daripada Kerajaan Negeri menerusi Tabung Usahawan Negeri Sembilan (TUNS).

Puan Husna Azlan dari Senawang berkata, pada peringkat awal beliau hanya berniaga secara online dan fokus kepada penghantaran (delivery) sahaja.

"Menerusi bantuan TUNS, saya dapat membeli dapur nasi yang lebih besar.

"Saya dapat menampung tempahan yang lebih banyak.

"Setelah membeli dapur baharu, saya dapat hasilkan kualiti makanan yang lebih baik.

"Pelanggan tetap saya (regular customer) juga semakin ramai yang datang beli secara berulang-ulang," jelas Husna.

Husna mengucapkan terima kasih kepada Kerajaan Negeri Sembilan yang memperkenalkan inisiatif TUNS.

Penerima TUNS dan TUNS PLUS berjaya gandakan pendapatan

Pengusaha Popcorn dan kerepek, Puan Norain Khairuddin dari Bahau berjaya mengandakan pendapatan selepas mendapat bantuan Kerajaan Negeri menerusi inisiatif TUNS dan TUNS PLUS.

Norain berkata, bantuan RM3,000 (TUNS) dan RM15,000 (TUNS PLUS) amat membantu usahawan industri kecil segerhana seperti beliau.

"Pinjaman tanpa faedah TUNS PLUS membolehkan saya membeli beberapa mesin seperti vakum sealer.

"Hasil bantuan TUNS PLUS, saya telah membeli vakum sealer iaitu vakum sedut

angin yang membolehkan saya meluaskan pasaran ke seluruh Malaysia.

"Vakum sealer ini perlu bagi memastikan popcorn dan bungkusannya yang dihantar ke seluruh negara tidak pecah.

"Apabila popcorn ini sampai kepada pengedar dan pelanggan di luar Negeri Sembilan, kualitinya terjamin.

"Setelah membeli vakum sealer ini, saya dapat meningkatkan pendapatan saya daripada RM5,000 kepada RM10,000 sebulan," jelas Norain.



Beli mesin jahit, ubah suai kedai dengan TUNS PLUS



Seorang usahawan yang menjalankan perniagaan jahitan berjaya mengubah suai kedainya dengan bantuan TUNS PLUS.

Zainal Abidin Hassan dari Senawang menjalankan perniagaan service alteration untuk pakaian termasuk zip dan tampil koyak. Beliau juga mengeluarkan produk jeans berjenama sendiri.

"Pada mulanya saya terima bantuan RM3,000 (TUNS).

"Selepas saya mendapat pinjaman tanpa faedah RM15,000 (TUNS PLUS), ianya banyak membantu saya selepas dari kesan pandemik Covid-19 apabila banyak sektor perniagaan yang agak lembap.

"Saya dapat menambah mesin jahit, membuat ubah suai kedai sedikit dan beli barang-barang jahitan untuk naik taraf kedai saya.

"Alhamdullillah setelah mendapat bantuan TUNS dan TUNS PLUS, segala kemudahan yang saya dapat sangat membantu daripada segi kualiti dan produktiviti," kata Zainal Abidin.

Menurut Zainal Abidin, beliau dapat hasilkan baju dan seluar dengan kualiti jahitan yang lebih baik selepas membeli mesin jahit dan peralatan yang baharu.

Bagaimana TUNS dan TUNS PLUS membantu peniaga kecil Negeri Sembilan?

Ikuti temubual eksklusif Nogori Kito bersama Ketua Eksekutif Perbadanan Kemajuan Negeri, Negeri Sembilan (PKNNS), Puan Rusmimah Mat Derus.

TUNS TELAH DIPERKENALKAN PADA TAHUN 2019. SETELAH EMPAT TAHUN PELAK-SANAAN TUNS DAN MEMASUKI TAHUN KELIMA, BAGAIMANA INISIATIFINI MEMBANTU USAHAWAN KECIL?

Tabung Usahawan Negeri Sembilan (TUNS) merupakan bantuan pembiayaan dalam bentuk geran berjumlah RM3,000 yang disasarkan kepada penjaja dan peniaga kecil di Negeri Sembilan. Geran TUNS memfokuskan kepada pembelian mesin dan peralatan perniagaan bagi tujuan peningkatan perniagaan usahawan terutamanya dari segi produktiviti.

Selain itu, TUNS secara tidak langsung menggalakkan penjaja dan peniaga kecil untuk bermula secara formal dengan mendaftarkan perniagaan mereka dengan Suruhanjaya Syarikat Malaysia (SSM) dan seterusnya melayakkan mereka untuk memohon bantuan perniagaan dari jabatan/agensi keusahawanan yang lain.

Semua penerima TUNS secara automatik adalah berdaftar sebagai usahawan Negeri Sembilan. Senarai usahawan-usahawan ini diberi peluang dan keutamaan untuk menyertai karnival jualan seperti NS Fest, Minggu Perusahaan Mikro, Kecil dan Sederhana (PMKS), Nismilan Showcase dan lain-lain program atau karnival anjuran agensi negeri dan persekutuan. Peluang ini membantu memberi pendedahan kepada usahawan mengenai dunia perniagaan sebenar.

TUNS DIPERKENALKAN PADA TAHUN 2019 DAN TUNS PLUS PADA TAHUN 2021. BAGAIMANA KEBERKESANAN KEDUA-DUA INISIATIFINI?

Daripada tahun 2019 sehingga 2022, inisiatif TUNS telah memberi manfaat kepada 5,149 orang usahawan manakala TUNS PLUS yang bermula tahun 2021 sehingga 2022 telah memberi manfaat kepada 417 orang usahawan. Berdasarkan Kajian Penilaian Outcome Program Inisiatif Negeri Sembilan yang telah dibuat

oleh Kumpulan Akademi Yayasan Negeri Sembilan pada tahun 2022, melaporkan:

- i. Seramai 82.9 peratus penerima berjaya meningkatkan pendapatan; manakala
- ii. Seramai 82.8 peratus penerima berjaya menawarkan peluang pekerjaan melalui perniagaan mereka.

Melalui trend peningkatan ini menunjukkan bahawa inisiatif TUNS telah berjaya memberi kesedaran kepada para peniaga untuk mendaftarkan perniagaan mereka di SSM dan mula bermula secara formal serta lebih sistematik dengan membuat rekod transaksi perniagaan mereka.



ADAKAH TUNS MENDIDIK PENIAGA KECIL BERNIAGA SECARA FORMAL?

TUNS dan TUNS PLUS secara dasarnya memfokuskan usahawan yang telah sediada bermula dan berdaftar seperti yang dinyatakan dalam syarat permohonan. Namun begitu mengikut laporan dari Suruhanjaya Syarikat Malaysia Negeri Sembilan (SSM), berlaku peningkatan bilangan usahawan yang mendaftarkan perniagaan mereka di Negeri Sembilan berbanding pada tahun 2018, tahun sebelum TUNS diperkenalkan. Kebanyakan usahawan ini telah lama bermula namun baru mendaftarkan perniagaan bagi membolehkan mereka memohon dan mendapatkan pembiayaan TUNS.

BERAPARAMAI PENIAGA KECIL YANG DAPAT MENGEMBANGKAN PERNIAGAAN MEREKA?

Berdasarkan kajian outcome itu juga, kira-kira 80 peratus penerima TUNS berjaya mengembangkan perniagaan mereka ke satu tahap yang lebih baik. Usahawan-usahawan ini juga telah mampu menggajikan pekerja, mempelbagaikan produk/perkhidmatan, meningkatkan produktiviti dan seterusnya meningkatkan pendapatan. Terdapat juga usahawan yang menjalankan perniagaan dari rumah secara kecil-kecilan kini telah berjaya mengembangkan perniagaan dengan beroperasi di premis perniagaan.



BAGAIMANA PULA DENGAN OBJEKTIF TUNS EXTRA PADA TAHUN INI?

TUNS EXTRA merupakan bantuan pembiayaan dalam bentuk geran padanan (matching-grant) berjumlah sehingga RM30,000 yang disasarkan kepada usahawan Negeri Sembilan yang mencatatkan jualan kurang daripada RM3 juta setahun.

Geran padanan ini adalah berkonsepkan tuntutan semula. Sebagai contoh, seorang usahawan ingin membeli mesin atau melaksanakan tertentu bagi meningkatkan produktiviti perniagaan mereka dengan kos keseluruhan projek bernilai RM60,000, maka usahawan tersebut boleh memohon TUNS EXTRA bagi projek tersebut.

Permohonan usahawan yang telah diluluskan perlu membayar dahulu keseluruhan kos projek yang telah dilaksanakan sebelum membuat tuntutan semula. Bagi kos projek yang bernilai RM60,000, geran padanan yang diberikan adalah berjumlah maksimum iaitu RM30,000.

Objektif TUNS EXTRA adalah untuk melanjukkan lagi usahawan ke tahap yang lebih baik dengan memperkuuh dan mentransformasikan perniagaan usahawan melalui penyediaan dana secara geran padanan. Ini secara tidak langsung juga dapat membuka lebih banyak peluang pekerjaan tambahan serta merangsang pertumbuhan ekonomi negeri. TUNS EXTRA ini adalah ibarat tangga ketiga dalam inisiatif pembangunan usahawan negeri selepas TUNS dan TUNS PLUS. Secara dasarnya itulah sedikit seban-

yak intipati TUNS EXTRA, namun begitu semuanya perlu dilulus dan disahkan oleh Lembaga Pengarah PKNNS terlebih dahulu terdiri daripada oleh YAB Menteri Besar, YB Setiausaha Kerajaan Negeri, YB Pegawai Kewangan Negeri, Ahli Exco Kerajaan Negeri dan lain-lain lagi.

ADAKAH PUAN MELIHAT PERANAN PENIAGA KECIL DAN USAHAWAN KECIL MENYUMBANG KEPADA PEMBANGUNAN EKONOMI NEGERI SEMBILAN?

Hasrat Kerajaan Negeri melalui inisiatif-inisiatif ini adalah untuk menjadikan sektor keusahawanan sebagai salah satu sektor ekonomi utama yang memacu landskap pembangunan negeri. Selain menjadikan sektor ini sebagai salah satu pilihan pekerjaan, pemerkasaan perusahaan mikro, kecil dan sederhana (PMKS) adalah sangat penting kerana berdasarkan kepada laporan Tinjauan PMKS 2021 yang dibuat oleh SME Corp Malaysia menunjukkan PMKS menyumbang sebanyak 38.1 peratus kepada pertumbuhan keluaran dalam negeri kasar (KDNK). Dari segi nilai, KDNK PMKS pada tahun 2021 bernilai RM518.1 bilion berbanding RM458.7 bilion yang dijana pada tahun 2016.

Manakala bagi prestasi guna tenaga pada tahun 2021 pula mencatatkan PMKS menyumbang hampir separuh daripada keseluruhan jumlah guna tenaga di Malaysia. PMKS memainkan peranan penting dalam membasi kemiskinan di samping meningkatkan taraf hidup rakyat. Bagi tahun 2021, PMKS menggaji seramai 7.32 juta pekerja berbanding 7.25 juta pekerja yang diambil bekerja pada tahun 2020. Justeru diharapkan dengan melahirkan lebih banyak PMKS melalui inisiatif-inisiatif pemerkasaan sektor keusahawanan ini secara langsung akan memberi impak positif kepada pembangunan ekonomi negeri dan kesejahteraan rakyat.

ADA APA-APA MAKLUMAT YANG PUAN INGIN KONGSIKAN KEPADA PEMOHON TUNS ATAU TUNS PLUS YANG BAHARU?

Objektif TUNS dan TUNS PLUS adalah supaya usahawan yang dibantu berjaya untuk mengembangkan dan meningkatkan perniagaan mereka ke arah yang lebih baik. Ini bermaksud peningkatan dari berstatus usahawan mikro menjadi kecil, kemudian dari kecil menjadi sederhana dan seterusnya.

Bermula sejak kedua-dua inisiatif ini diperkenalkan, ramai usahawan di Negeri Sembilan yang telah mendapat manfaat. PKNNS juga sentiasa menambah baik pelaksanaan inisiatif-inisiatif ini dari semasa ke semasa bagi memastikan bantuan ini sampai ke kumpulan sasar.

Sebagai contoh, pada tahun 2019, permohonan TUNS perlu dibuat secara manual menggunakan borang fizikal di mana para pemohon perlu menghantar borang permohonan dan dokumen sokongan ke pejabat PKNNS. Ia menjadi satu kekangan utama untuk pemohon yang menetap jauh dan di luar dari daerah Seremban kerana perlu mengambil kira jarak, kos dan masa perjalanan mereka.

Oleh yang demikian, seiring dengan perkembangan teknologi digital masa kini, di mana penggunaan telefon pintar dan internet sudah dianggap sebagai satu keperluan, kaedah permohonan TUNS telah di digitalkan sepenuhnya bermula pada tahun 2020.

Semua permohonan boleh dibuat secara atas talian tanpa perlu ke pejabat melalui laman sesawang www.tuns.my.

Namun begitu, sukacita diingatkan bahawa pemohon perlulah membaca segala syarat-syarat permohonan sebelum permohonan dibuat bagi memastikan permohonan yang dihantar adalah lengkap dan memenuhi syarat seterusnya membolehkan permohonan diluluskan dengan mudah dan cepat.



Negeri Sembilan peruntuk RM28 juta bantu peniaga kecil

EDITORIAL: Kerajaan Negeri Sembilan telah memperuntukkan RM28 juta melalui Perbadanan Kemajuan Negeri, Negeri Sembilan (PKNNS) bagi membantu dan memajukan perniagaan peniaga kecil dan usahawan kecil.

Seramai 6,799 peniaga kecil dan usahawan kecil telah dan akan mendapat manfaat daripada Tabung Pembangunan Usahawan Negeri Sembilan (TUNS), TUNS PLUS dan TUNS EXTRA.

TUNS merupakan geran RM3,000 yang tidak perlu dibayar balik, diperkenalkan pada tahun 2019 dengan peruntukan RM3 juta dan seramai 1,046 peniaga kecil mendapat bantuan kewangan TUNS.

Pada tahun kedua 2020, peruntukan ditingkatkan kepada RM6 juta dan 2,023 peniaga kecil mendapat manfaat daripada geran bantuan tersebut.

Seramai 1,078 peniaga kecil menerima bantuan TUNS pada tahun 2021 yang membabitkan peruntukan RM3 juta.

Manakala pada tahun 2022 dengan peruntukan RM3 juta, seramai 1,002 peniaga kecil telah dibantu.

Pada tahun 2023, peruntukan RM3 juta disediakan dengan sasaran penerima 1,000 peniaga kecil.

Secara keseluruhan, daripada tahun 2019 hingga 2023; seramai 6,149 peniaga kecil telah dan akan menerima bantuan TUNS.

TUNS PLUS

TUNS PLUS pula merupakan pinjaman tanpa faedah maksimum RM15,000 bagi usahawan kecil memperbesarkan perniagaan mereka.

Pada tahun 2021, seramai 213 usahawan kecil mendapat manfaat dengan peruntukan RM3 juta.

Seramai 204 usahawan kecil menerima dana TUNS PLUS dengan peruntukan RM3 juta pada tahun 2022.

Pada tahun ini, seramai 200 usahawan kecil disasarkan akan mendapat manfaat TUNS PLUS dengan dana RM3 juta.

TUNS EXTRA

TUNS EXTRA diperkenalkan pada tahun ini, merupakan geran padanan dengan bantuan maksimum RM30,000.

Peruntukan RM1 juta disediakan oleh Kerajaan Negeri melalui PKNNS bagi membantu 33 usahawan kecil mengembangkan perniagaan mereka.

PINJAMAN MUDAH

TUNS Plus

Bantuan pembiayaan dalam bentuk PINJAMAN MUDAH TANPA FAEDAH berjumlah sehingga RM15,000.00 yang disasarkan kepada USAHAWAN MIKRO Negeri Sembilan

DIAWALKAN

2023

TARIKH PERMOHONAN DIBUKA: 3 APRIL 2023

1 FEBRUARI 2023

SYARAT ASAS PERMOHONAN

- Warganegara Malaysia & anak Negeri Sembilan/ pengundi di Negeri Sembilan
- Pendaftaran perniagaan di SSM sebelum 1 April 2022
- Berstatus Mikro yang mencatatkan jualan kurang daripada RM300,000.00 setahun
- Berumur di antara 21 - 55 tahun
- Beroperasi dan beralamat di Negeri Sembilan
- Beroperasi di premis/tapak perniagaan & mempunyai lesen/ permit PBT
- Akaun perniagaan yang sah dan aktif sekurang-kurangnya 6 bulan
- Tidak berstatus muflis
- Tidak pernah menerima TUNS Plus

GERAN

TUNS

Bantuan pembiayaan dalam bentuk GERAN berjumlah sehingga RM3,000.00 yang disasarkan kepada PENJAJA/ PENIAGA KECIL di Negeri Sembilan

2023

TARIKH PERMOHONAN DIBUKA: 16 JANUARI 2023

SYARAT ASAS PERMOHONAN

- Warganegara Malaysia & anak Negeri Sembilan/ pengundi di Negeri Sembilan
- Pendaftaran perniagaan di SSM sebelum 1 Oktober 2022
- Penjaja atau peniaga kecil yang mencatatkan jualan kurang daripada RM100,000.00 setahun
- Beroperasi dan beralamat di Negeri Sembilan
- Tidak berstatus muflis
- Tidak pernah menerima TUNS

Negeri Sembilan dijangka capai pelaburan RM9 bilion

PORT DICKSON: Kerajaan Negeri Sembilan dijangka akan mencapai jumlah pelaburan RM9 bilion bagi tahun 2022.

Menteri Besar Negeri Sembilan, YAB Dato' Seri Aminuddin Harun berkata, sehingga suku ketiga tahun 2022, Kerajaan Negeri telah mencatat pelaburan RM8.72 bilion.

"Saya amat yakin Kerajaan Negeri Sembilan akan sekali lagi mencatat sejarah yang amat luar biasa apabila jumlah pelaburan bagi keseluruhan tahun 2022 dijangka akan

mencapai RM9.0 bilion iaitu rekod pencapaian tertinggi dalam sejarah pentadbiran Negeri Sembilan.

"Ini termasuk pelaburan berjumlah RM6.0 bilion daripada syarikat Samsung SDI Energy Malaysia Sdn Bhd (SDIEM) yang kini sedang membina sebuah kilang membuat Sel Bateri Kenderaan Elektrik (EV) Fasa ke-2 di Kawasan Perindustrian Tuanku Jaafar, Senawang," kata Aminuddin di Majlis Penghargaan Pelabur Bersama YAB Menteri Besar Negeri Sembilan di Hotel Grand Lexis, Port Dickson



Kerja undi selenggara jalan bukti ketelusan Kerajaan Negeri



SEREMBAN: Kerja undi bagi projek selenggara jalan di Negeri Sembilan merupakan bukti ketelusan Kerajaan Pakatan Harapan Negeri Sembilan.

Menteri Besar Negeri Sembilan, YAB Dato' Seri Aminuddin Harun berkata, sebanyak RM34 juta diperuntukkan bagi projek selenggara ini.

"Sebanyak 2,278 kontraktor G1 di negeri ini telah berjaya memenuhi syarat serta layak menyertai kerja-kerja undi berkenaan.

"Manakala, hanya 340 sahaja bilangan kerja yang akan diundi dengan setiap satu ber-

nilai RM100,000.

"Kaedah ini diteruskan lagi kerana mendapat maklum balas yang baik.

"Di samping dapat merangsang ekonomi kontraktor kelas G1 di negeri ini.

"Dalam masa sama, ia juga turut memberi manfaat kepada pembangunan dan menambahbaik infrastruktur untuk kegunaan rakyat Negeri Sembilan," kata Aminuddin di Majlis Perasmian Program Cabutan Kerja Undi Fasa 1 Tahun 2023, Penyelenggaraan Jalan Kerajaan Negeri Sembilan.

Nak tahu **apa yang terkini dan best** tentang Negeri Sembilan?

LAYARI PORTAL NEGERI KITA

www.negerikita.org



INISIATIF TUNS, TUNS PLUS, TUNS EXTRA



Sebarang pertanyaan dan permohonan boleh berhubung dengan
Perbadanan Kemajuan Negeri, Negeri Sembilan (PKNNS)



Ismail turun padang kawasan hotspot kemalangan

LABU: Ahli Dewan Undangan Negeri (ADUN) Labu, YB Dato' Ismail Ahmad telah turun padang bagi melihat kawasan hotspot kemalangan di DUN Labu.

Ismail berkata, kemalangan yang berlaku disebabkan oleh keadaan jalan yang sering rosak dan berlubang.

"Untuk makluman, kebanyakkan jalan utama di DUN Labu dikawal selia oleh Jabatan Kerja Raya Persekutuan.

"Walaupun begitu, saya akan membuat permohonan untuk

baikpulih atau naik taraf demi keselamatan dan keselesaan pengguna jalan raya di DUN Labu.

"Saya juga berharap agar pengguna jalan raya lebih berhati-hati ketika memandu terutamanya pada waktu malam," kata Ismail yang juga Exco Pembangunan Luar Bandar Negeri Sembilan.

Ismail berkata demikian selepas melawat beberapa kawasan hotspot kemalangan di DUN Labu.



Pesakit barah otak terima sumbangan kewangan daripada Bakri



KLAWANG: Ahli Dewan Undangan Negeri (ADUN) Klawang, YB Dato' Ir.Bakri Sawir telah memberikan sumbangan kewangan kepada Cik Nur Raudhahtul Jannah Muhammad Saifuddin yang mengidap sakit barah otak.

Bakri berkata, Cik Raudhahtul memerlukan pembiayaan sebanyak RM10,000 bagi kos perubatan beliau.

"Saya telah difahamkan pihak sekolah beliau telah mencarikan kutipan derma bagi

membayai kos perubatan beliau.

"Di kesempatan ini juga, saya ingin meneru kepada semua yang berkemampuan untuk menghulurkan sumbangan kepada Puan Azizah Kasim yang merupakan ibu kepada Cik Raudhahtul," kata Bakri.

Sumbangan boleh dilakukan di akaun berikut: CIMB Bank - 7602255597 - Puan Azizah Binti Kasim.

Saiful santuni penduduk DUN Sungai Lui

SUNGAI LUI: Penyelaras DUN Sungai Lui, Tuan Saiful Bahri Jaaman telah turun padang bagi menyantuni penduduk di DUN Sungai Lui.

Saiful berkata, aktiviti ini dilakukan bagi mengenal pasti mereka yang memerlukan bantuan di samping dapat mengeratkan sillaturrahim.

"Saya turut memberikan sumbangan barang dapur

kepada mereka yang memerlukan.

"Saya mendoakan agar mereka yang ditimpah dugaan terus kuat dan tabah dalam mengharunginya," kata Saiful.

Saiful berkata, beliau akan menyantuni mereka yang memerlukan bantuan secara berterusan mengikut keperluan di DUN Sungai Lui.



Wanita Pakatan Harapan anjur Hi Tea perpaduan

SEREMBAN: Exco Hal Ehwal Wanita, Keluarga dan Kebajikan merangkap Ketua Wanita Pakatan Harapan Negeri Sembilan, YB Nicole Tan Lee Koon telah mengadakan Hi Tea perpaduan di Klana Resort.

Nicole berkata, program ringkas tersebut dihadiri semua pimpinan wanita Pakatan Harapan dan Barisan Nasional.

"Ini merupakan titik permulaan untuk menjalankan per-

sahabatan demi perpaduan negara kita.

"Dalam pada itu, Ketua Wanita UMNO, Dato' Lateffah Ali tidak dapat hadir kerana sibuk dengan pemilihan parti.

"Walaubagaimanapun, saya akan aturkan perjumpaan dengan beliau selepas ini," kata Nicole yang juga Ahli Dewan Undangan Negeri (ADUN) Bukit Kepayang.



PIBG SJKC Forest Height terima sumbangan RM3,000 daripada Gunasekaren



SEREMBAN JAYA: Ahli Dewan Undangan Negeri (ADUN) Seremban Jaya, YB P.Gunasekaren telah memberi sumbangan kewangan sebanyak RM3,000 kepada Persatuan Ibu Bapa dan Guru Sekolah Jenis Kebangsaan Cina Forest Height.

Gunasekaren berkata, sumbangan tersebut bagi membantu mereka menjalankan

aktiviti pelajar.

"Semoga sumbangan ini dapat membantu mereka untuk meningkatkan prestasi pelajar di sekolah ini," kata Gunasekaren.

Turut hadir, Ahli Parlimen Rasah, YB Cha Kee Chin dan Setiausaha Majlis Bandaraya Seremban, Tuan Mas Midyawan Yahya.

Rusli santuni warga emas DUN Linggi

LINGGI: Penyelaras DUN Linggi, Tuan Rusli Abdullah telah menyantuni golongan warga emas yang memerlukan bantuan di sekitar DUN Linggi.

Rusli berkata, aktiviti tersebut dilakukan bagi membantu mereka yang memerlukan bantuan di samping mengeratkan hubungan.

"Kebanyakkannya mereka yang disantuni merupakan pesakit

kronik dan keuzuran.

"Saya juga memberikan sumbangan barang asas kepada mereka yang memerlukannya."

"Aktiviti membantu golongan warga emas ini akan diadakan secara berterusan dari semasa ke semasa mengikut keperluan," kata Rusli.



Cha sumbang RM25,000 kepada SMK Seremban Jaya

RASAH: Ahli Parlimen Rasah, YB Cha Kee Chin menyumbang RM25,000 kepada Sekolah Menengah Kebangsaan Seremban Jaya 2.

Cha menyerahkan peruntukan Ahli Parlimen Rasah yang bernilai RM7,000 kepada Pengetua sekolah.

"Saya juga mengumumkan peruntukan (Projek Mesra Rakyat) sebanyak RM18,000 untuk membekalkan meja dan kerusi pelajar.

"Tahniah kepada semua pelajar yang berjaya

menamatkan pendidikan sekolah menengah selama lima tahun.

"Semoga mencapai keputusan cemerlang dalam peperiksaan SPM nanti.

"Terima kasih kepada pihak sekolah yang menganjurkan majlis yang amat bermakna ini," kata Cha.

Cha berkata demikian di Majlis Perasmian Graduasi SPM Sekolah Menengah Kebangsaan Seremban Jaya 2, di Casa Lagenda.



Mangsa kemalangan terima sumbangan kewangan daripada Shahran



SERI MENANTI: Penyelaras DUN Seri Menanti, Tuan Shahran Kaat telah memberikan sumbangan kewangan kepada Encik Muruga Kanda Kandden.

Shahran berkata, Encik Muruga Kanda terlibat dalam satu kejadian kemalangan jalan raya baru-baru ini.

"Justeru, saya telah menziar-

ahi beliau dan menyerahkan sumbangan kewangan kepada beliau bagi membantu meringankan beban beliau.

"Saya berdoa agar beliau diberi kesembuhan seperti sedia kala," kata Shahran.

Turut hadir menziarahi Muruga Kanda ialah kepimpinan KeADILan Cabang Kuala Pilah.

Pasukan sepak takraw IPD Jempol terima sumbangan kewangan

JERAM PADANG: Penyelaras DUN Jeram Padang, Tuan Musliadi Sabtu telah memberi sumbangan kewangan kepada pasukan sepak takraw Ibu Pejabat Daerah Jempol.

Musliadi berkata, pasukan sepak takraw IPD Jempol

akan menyertai Kejohanan Sepak Takraw Ketua Polis Negeri Sembilan di Kompleks Belia dan Sukan Paroi.

"Saya mendoakan kejayaan memihak kepada pasukan mereka," kata Musliadi.



Pembinaan sistem perparitan Kg Melayu Panchor siap sepenuhnya

LENGGENG: Pembinaan serta penambahbaikan sistem perparitan culvert yang lebih besar di Kampung Melayu Panchor telah siap sepenuhnya.

Ahli Dewan Undangan Negeri (ADUN) Lenggeng, YB Suhaimi Kassim berkata, sistem perparitan yang dibina sepanjang 300 meter itu bagi mengatasi masalah banjir di kawasan itu.

“Dalam masa sama, ia juga mampu mengatasi masalah banjir yang mengganggu kenderaan yang lalu

“Saya sentiasa mengambil berat tentang permasalahan penduduk DUN Lenggeng termasuk perkara yang berkaitan dengan infrastruktur dan kemudahan awam,” kata Suhaimi.



Razali sumbang kewangan kepada SK Kuala Kepis



SENALING: Sekolah Kebangsaan Kuala Kepis telah menerima sumbangan kewangan daripada Penyelaras DUN Senaling, Tuan Mohd Razali Abdul Latif.

Mohd Razali berkata, pihak sekolah akan mengadakan Majlis Hari Graduasi bagi murid Tahun Enam.

“Majlis ini amat penting bagi menghargai pelajar yang

menamatkan pendidikan selama enam tahun di sekolah rendah.

“Oleh itu sumbangan ini diberikan bagi membantu pihak sekolah membuat persiapan untuk menjayakan Majlis Hari Graduasi tersebut.

“Semoga program tersebut berjalan dengan lancar,” kata Mohd Razali.

Ravi santuni penduduk Kampung Arab

SRI TANJUNG: Ahli Dewan Undangan Negeri (ADUN) Sri Tanjung, YB Dato' M.Ravi telah turun padang bagi menyantuni penduduk di Kampung Arab.

Ravi berkata, aktiviti tersebut dilakukan bagi mengenal pasti mereka yang memerlukan bantuan dan merapatkan hubungan sillaturrahim.

“Saya turut memberikan sumbangan seperti wang tunai, barang dapur dan tongkat bagi mereka yang memerlukan.

“Semoga sumbangan yang diberikan dapat membantu meringankan beban mereka,” kata Ravi yang juga Timbalan Yang DiPertua Dewan Undangan Negeri, Negeri Sembilan.

Ravi menasihatkan penduduk DUN Sri Tanjung yang memerlukan bantuan agar menghubungi MPKK atau datang ke Pusat Khidmat Rakyat DUN Sri Tanjung.

Turut hadir, Ketua Kampung Paya, Encik Lionel dan Ketua Wanita KeADILan Port Dickson, Puan Ros.



SK Telok Kemang terima sumbangan RM3,000 daripada Nasir

BAGAN PINANG: Sekolah Kebangsaan (SK) Telok Kemang telah menerima sumbangan kewangan sebanyak RM3,000 daripada Penyelaras DUN Bagan Pinang, Tuan Nasir Ramam.

Nasir berkata, sumbangan tersebut bagi membantu pihak sekolah menjalankan aktiviti pelajar.

"Saya sangat menitikberatkan soal pendidikan golon-

gan pelajar.

"Hanya pendidikan yang akan membantu golongan pelajar untuk berjaya dalam kehidupan apabila sudah dewasa.

"Justeru saya telah menyumbang RM3,000 kepada pihak sekolah.

"Sumbangan telah diberikan di Pejabat Penyelaras DUN Bagan Pinang," kata Nasir.



Nasrudin santuni pelajar USIM



CHEMBONG: Penyelaras DUN Chembong, Tuan Nasrudin telah melapangkan masa menyantuni pelajar Universiti Islam Negeri Sembilan (USIM) dalam Program Santuni Masyarakat Orang Asli di Kampung Ulu Chembong.

Nasrudin berkata, program selama tiga hari ini telah mendekatkan para pelajar dengan masyarakat Orang Asli.

"Program ini memberi peluang kepada pelajar menda-

lami kehidupan masyarakat Orang Asli serta menerapkan perubahan masa dan mengubah semangat pelajar menjadi insan yang lebih berjaya.

"Saya berharap pengalaman bersama masyarakat Orang Asli dapat memberi ilmu dan pendedahan baharu kepada pelajar USIM dalam karier pendidikan dan apabila sudah bekerja nanti," ujar Nasrudin.

Latif galak belia Felda Sungai Kelamah aktif

GEMENCHEH: Penyelaras DUN Gemencheh, Tuan Abd Latif A.Tambi menyampaikan sumbangan bola sepak dan bola tampar kepada belia Felda Sungai Kelamah.

"Sumbangan ini disampaikan sebagai satu usaha menggalakkan belia luar bandar bergiat dalam aktiviti yang sihat seperti sukan."

"Dalam pada itu, saya juga meluangkan masa menghadiri jemputan Majlis Kenduri Sekampung serta Bacaan

Tahlil anjuran MPKK Felda Sungai Kelamah.

"Majlis ini diadakan bagi meraikan kemenangan MPKK Felda Sungai Kelamah dalam pertandingan Anugerah Kampung bulan lepas."

"Tahniah diucapkan kepada seluruh Ahli Jawatankuasa MPKK Felda Sungai Kelamah yang berganding bahu sehingga dinobatkan Johan Anugerah Kampung bagi pentadbiran Pejabat Daerah Kecil Gemas," kata Abd Latif.



Negeri Sembilan komited menyediakan rumah mampu milik



SEREMBAN: Sebanyak 207 buah keluarga berjaya memiliki Rumah Mampu Milik (RMM) Type A di Taman Bakti Yayasan Negeri Sembilan (YNS), Labu.

Menteri Besar Negeri Sembilan, YAB Dato' Seri Aminuddin Harun berkata, seramai 486 peserta telah melepassi tapisan serta melayakkan diri mereka untuk diundi bagi projek perumahan ini.

"RMM Type A ini berharga RM80,000 dan setiap projek perumahan sejak 2018 diwajibkan mempunyai sebanyak 20 peratus RMM Type A."

"Rumah tersebut kemudiannya diserahkan kepada Unit Perumahan, Pejabat Setiausaha Kerajaan Negeri Sembilan bagi melalui proses pengundian."

"Langkah ini diambil bagi mengelakkan mana-mana pihak memonopoli rumah dan seterusnya menafikan hak rakyat yang memerlukan."

"Semoga inisiatif ini dapat membantu lebih ramai rakyat Negeri Sembilan untuk memiliki rumah sendiri," ujar Aminuddin.

Negeri Sembilan teruskan insentif diskau premium tanah

SEREMBAN: Kerajaan Negeri Sembilan meneruskan insentif diskau premium pembangunan tanah bagi menggalakkan sektor perniagaan untuk tahun ketiga.

Menteri Besar Negeri Sembilan, YAB Dato' Seri Aminuddin Harun berkata, diskau 25 peratus diberikan kepada pemohon

yang menjelaskan bayaran premium sekaligus dalam tempoh 30 hari dari tarikh menerima Notis 5A atau 7G daripada pentadbir Tanah Daerah.

"Sekiranya premium dijelaskan sekaligus dalam tempoh 60 hari, diskau sebanyak 15 peratus diberikan."

"Insentif ini diperkenalkan pada tahun 2021 dan Majlis Mesyuarat Kerajaan Negeri (Mesyuarat Exco) bersetuju untuk meneruskan insentif ini pada tahun ini," kata Aminuddin yang juga Ahli Dewan Undangan Negeri (ADUN) Sikamat.

Kerajaan Negeri sasar 100 buah masjid jadi pusat pembangunan ummah pada 2024



SEREMBAN: Kerajaan Pakatan Harapan Negeri Sembilan mensasarkan sebanyak 100 buah masjid di seluruh negeri untuk dijadikan pusat pembangunan ummah menjelang tahun 2024.

Menteri Besar Negeri Sembilan, YAB Dato' Seri Aminuddin Harun berkata, institusi masjid perlu dijadikan sebagai pusat perhentian sementara umat Islam sebagai rujukan.

"Kita juga meletakkan saran bahawa bilangan jemaah meningkat sebanyak sekali ganda.

"Sebagai contoh, sekiranya hari ini jemaah yang hadir ke masjid seramai 100 orang, menjelang hujung tahun hadapan ia meningkat kepada 200 orang.

"Dalam masa sama, Jabatan Hal Ehwal Agama Islam (JHEAINS) juga turut menerbitkan Pelan Peningkatan Jemaah Masjid Negeri Sembilan (JEMAAH) dengan tujuan meningkatkan bilangan jemaah ke masjid.

"Oleh itu, besarlah harapan saya agar masjid di negeri ini dapat diimarahkan di samping memperkasakan masjid sebagai tempat perjumpaan, tempat interaksi sosial, tempat untuk menyatukan serta merapatkan hubungan silaturrahim sesama ummah, Insya Allah," kata Aminuddin.

Aminuddin berkata demikian di Majlis Penyerahan Watikah Jawatankuasa Qariah Masjid Negeri Sembilan 2023-2023 di Klana Resort, Seremban.

MAINS peruntuk RM8.5 juta bagi inisiatif PEKA



SEREMBAN: Majlis Agama Islam Negeri Sembilan (MAINS) menerusi inisiatif keprihatinan bantuan zakat Pribatin Ekonomi dan Keperluan Asas Asnaf (P.E.K.A) telah memperuntukkan RM8,505,500 bagi institusi pendidikan dan kebajikan di negeri ini.

Menteri Besar Negeri Sembilan, YAB Dato' Seri Aminuddin Harun berkata, sebanyak RM4,220,000 disalurkan kepada sekolah kerajaan dan swasta yang terpilih

seluruh Negeri Sembilan.

"Manakala, sebanyak RM240,000 diberikan kepada Pusat Jagaan dan Latihan OKU, Jabatan Kebajikan Masyarakat Negeri Sembilan.

"RM845,500 pula akan disalurkan bagi meringankan beban kewangan guru KAFA Jabatan Hal Ehwal Agama Islam (JHEAINS).

"Penuntut Institut Pengajian Tinggi (IPT) dalam dan luar negara juga turut menerima sumbangan sebanyak RM1.2 juta.

"Akhir sekali, asnaf fakir dan miskin MAINS turut menerima sumbangan bantuan khas yang berjumlah RM2.02 juta," kata Aminuddin yang juga Ahli Dewan Undangan Negeri (ADUN) Sikamat.

Stadium Paroi bakal berwajah baharu

SEREMBAN: Stadium Tuanku Abdul Rahman Paroi (Stadium Paroi) bakal berwajah baharu apabila kerja-kerja naik taraf stadium akan dilaksanakan tidak lama lagi dengan kos RM1.2 juta.

Exco Pembangunan Belia dan Sukan Negeri Sembilan, YB Dato' Mohamad Taufek Abd Ghani berkata, kerja naik taraf itu melibatkan pengantian tempat duduk di Stadium Paroi.

"Pemasangan kerusi bernombor di stadium ini dianggarkan boleh memuatkan sehingga 45,000 penonton.

"Pasukan Negeri Sembilan FC (NSFC) hampir layak ke Kejohanan Piala AFC mewakili negara pada musim lalu.

"Walaubagaimanapun, sekiranya NSFC layak ke Piala AFC, salah satu syarat utama AFC ialah tempat duduk mestilah

mempunyai kerusi bernombor dan bukannya teres seperti sekarang ini.

"Justeru, Kerajaan Negeri Sembilan mengambil langkah proaktif demi pembangunan bolasepak, sekiranya pasukan Negeri Sembilan FC (NSFC) terpilih ke Piala AFC pada tahun ini," kata Mohamad Taufek yang juga Ahli Dewan Undangan Negeri (ADUN) Paroi.



Rumput padang Stadium Paroi akan ditukar kepada Zeon Zoysia

SEREMBAN: Padang Stadium Tuanku Abdul Rahman Paroi bakal berwajah baharu apabila kerja menggantikan rumput padang akan dilaksanakan tidak lama lagi.

Exco Pembangunan Belia dan Sukan Negeri Sembilan, YB Dato' Mohamad Taufek Abd Ghani berkata, Kementerian Belia Dan Sukan (KBS) memberi kelulusan untuk menukar padang di stadium tersebut kepada rumput jenis Zeon Zoysia.

"Ini adalah rumput yang sama yang digunakan di Stadium Sultan Ibrahim Johor Bahru, Stadium Nasional Singapura, Stadium Bung Karno Jakarta dan juga bakal ditanam di Stadium Nasional Bukit Jalil nanti."

"Saya telah bermesyuarat dengan Menteri Belia dan Sukan, YB Hannah Yeoh dan Kerajaan Persekutuan melalui KBS telah bersetuju membantu Kerajaan Negeri untuk menukar jenis rumput yang sedia ada di stadium ini."

"Rumput ini dikenali jenis Zeon Zoysia yang tahan lasak dengan cuaca hujan dan tahan panas."

"Tawaran KBS adalah membantu sebanyak 50 peratus kos penukaran rumput manakala 50 peratus lagi (soil work) ditanggung oleh Kerajaan Negeri."

"Ini tawaran daripada YB Hannah Yeoh sendiri dan kita menyambut baik tawaran beliau itu," jelas Mohamad Taufek.

Tiada penyelewengan zakat MAINS: SPRM

SEREMBAN: Suruhanjaya Pencegahan Rasuah Malaysia (SPRM) Negeri Sembilan mengesahkan tiada penyelewangan wang zakat melibatkan Majlis Agama Islam Negeri Sembilan (MAINS) Zakat Sdn Bhd.

Pengarah SPRM Negeri Sembilan, Awgkok Ahmad Taufik Putra Awg Ismail berkata, pihaknya telah membuka kertas siasatan berhubung dakwaan tersebut pada 2019 dan mendapati tiada sebarang unsur kesalahan jenayah rasuah.

"SPRM berharap mana-mana pihak menghentikan penyebaran berita-berita palsu berhubung perkara berkenaan sebagaima-

na disiarkan dalam sebuah akaun Telegram baru-baru ini. "SPRM Negeri Sembilan sentiasa komited dalam usaha memerangi rasuah yang melibatkan dana awam di negeri ini," katanya.

Kelmarin, Menteri Besar Negeri Sembilan, YAB Dato' Seri Aminuddin Harun berkata, beliau menyerahkan kepada SPRM dan pihak polis menjalankan siasatan berhubung perkara tersebut.

"Sekiranya dakwaan itu benar, kena ambil tindakan dan sekiranya sebaliknya, maklum kepada masyarakat," ujar Aminuddin.



MAINS nafi fitnah salah guna wang zakat

Majlis Agama Islam Negeri Sembilan (MAINS) menafikan tohmahan dan fitnah yang disebar melalui media sosial berkenaan salah guna wang zakat di Negeri Sembilan.

Susulan daripada tohmahan dan fitnah yang telah disebarluaskan pada 2019, pihak MAINS telah membuat beberapa laporan polis terhadap pemilik media sosial terbabit.

Pihak MAINS turut memberi kerjasama sepenuhnya kepada pihak berkuasa iaitu pihak Polis Diraja Malaysia (PDRM), Suruhanjaya Pencegahan Rasuah Malaysia (SPRM) serta Jabatan Audit Negara bagi menjalankan siasatan penuh dan pengauditan terperinci terhadap semua dakwaan tersebut.

Namun pada 2023, dakwaan yang sama diulang siar oleh pihak-pihak yang tidak bertanggungjawab bagi memenuhi kepentingan peribadi.

MAINS sebagai agensi Badan Berkanun yang dinaungi oleh DYMM Yang Dipertuan Besar Negeri Sembilan sentiasa memastikan pengurusannya mematuhi konsep ketulusan, akauntabiliti serta berintegriti tinggi dalam semua aspek tatakelolanya.

Laporan polis telah dibuat oleh MAINS

Pihak MAINS juga menafikan sebarang tohmahan dan fitnah terhadap Kerajaan Negeri yang diterajui oleh YAB Menteri Besar Negeri Sembilan berkenaan penyalitannya dalam isu berkaitan.

Malahan pihak Kerajaan Negeri sentiasa berganding bahu bersama pihak MAINS memastikan semua perkara yang menyentuh masyarakat Islam di Negeri ini sentiasa terbela dan disantuni sebaik-baiknya.

Sehubungan itu, pihak MAINS menasihati masyarakat sentiasa Tabayyun (menyemak asas kebenarannya) se-

belum menyebarkannya bagi mengekalkan sebarang agenda atau perkara yang tidak baik berlaku seperti fitnah, menipu dan memburukkan seseorang yang lain berlandaskan hawa nafsu dan sifat kebencian.

Pihak MAINS juga sekali lagi telah membuat laporan polis dan berharap pihak berkuasa menyiasat dan mengambil tindakan kepada mana-mana pihak yang menimbulkan persepsi negatif dan kegusaran awam terhadap MAINS.

Sebarang hal berkaitan salah laku, pihak MAINS menyerahkan kepada pihak berkuasa bagi menjalankan siasatan dan MAINS memberikan kerjasama sepenuhnya serta tidak berkompromi terhadap perkara berkaitan salah laku.

**Dato' Seri Dr. Abdul Aziz Ab Kadir
Pengerusi Majlis Agama Islam Negeri Sembilan (MAINS)**